

四庫全書

史部

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十二

崇祀典

雍正元年癸卯三月甲午

上諭內閣禮部

至聖先師孔子道冠古今德參天地樹百王之模範立
萬世之宗師其為功於天下者至矣而水源木本積厚

流光有開必先克昌厥後則

聖人之祖考宜膺崇厚之褒封所以追溯前徽不忘所
自也粵稽舊制

孔子之父叔梁公於宋真宗時追封啟聖公自宋以後
歷代遵循而叔梁公以上則向來未加封號亦未奉祀
祠庭朕仰體

皇考崇儒重道之盛心敬修崇德報功之典禮意欲追封
五代並享烝嘗用伸景仰之誠庶慰羹牆之慕內閣禮

部可會同確議具奏

四月丁卯禮部奏

孔子先世五代俱應封公爵

上諭曰五倫為百行之本天地君親師人所宜重而天地君親之義又賴師教以明自古師道無過於

孔子誠首出之聖也我

皇考崇儒重道超軼千古凡尊崇

孔子典禮無不備至朕蒙

皇考教育自幼讀書心切景仰欲再加尊崇更無可增之處故敕部追封

孔子先世五代今部議封公上考歷代帝王皆有尊崇之典唐明皇封

孔子為文宣王宋真宗加封至聖文宣王封

孔子父叔梁紇為齊國公元加封

孔子為大成至聖文宣王加封齊國公為啟聖王至明嘉靖時猶以王係臣爵改稱為

至聖先師孔子改啟聖王為啟聖公王公雖同屬尊稱
朕意以為王爵較尊

孔子五世應否封王之處著詢問諸大臣具奏

七月甲申

上諭禮部國家祀典必貴潔誠

先農壇每歲展祀且為親耕藉田之所最宜清肅舊制
圍牆內有地一千七百畝以二百畝給壇戶種植五穀
蔬菜以供祭祀餘一千五百畝每年交租銀三百兩以

備修理聞康熙四十年間內務府撥給園頭耕種菜盛
蔬菜無所從出惟向市井採買殊非潔淨精誠之意今
著園頭清還地畝仍給太常寺壇戶耕種以供祭祀之
需餘地一千五百畝著將內外圍牆查明丈尺每種地
十畝估計令其修牆若干務期加謹葺護毋致傾壞每
年派滿漢太常寺少卿一員不時稽察庶壇壝清潔祀
事更加虔謹矣

九月乙未

上諭大學士等朕近於

聖祖仁皇帝所遺書笥中檢得未經頒發

諭旨一道以明太祖崛起布衣統一方夏經文緯武為漢
唐宋諸君之所未及其後嗣亦未有如前代荒淫暴虐
亡國之跡欲大廓成例訪其支派一人量授官職以奉
春秋陳薦仍令世襲朕伏讀之下仰見我

聖祖仁皇帝海涵天覆大度深仁遠邁百王超軼萬古朕
思史載東樓詩歌白馬商周以來無不推恩前代後世

類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

諭旨頒發訪求明太祖支派子姓一人量授職銜俾之承襲以奉春秋祭享但恐有明迄今年代久遠或有姦徒假冒致生事端爾內閣大學士卽會同廷臣詳明妥議以副

聖祖仁皇帝寬仁矜恤之至意

雍正二年甲辰五月辛酉禮部等衙門遵

旨議奏從祀

孔廟諸儒

上諭曰先儒從祀

文廟關係學術人心典至重也宜復宜增必詳加考證
折衷盡善庶使萬世遵守永無異議爾等所議復祀諸
儒雖皆有功經學然戴聖何休未為純儒鄭衆盧植服
虔范甯謹守一家言轉相傳述視鄭康成之淳質深通

卷三十二
似乎有間至若唐之陸贄宋之韓琦勲業昭垂史冊自是千古名臣然於孔孟心傳果有授受而能表彰羽翼乎其他諸儒是否允協以及宰子冉有增置博士之處著再公同確議務期至當不易

八月甲午禮部等衙門遵

旨再議從祀

孔廟先賢先儒宜復祀者六人林放蘧瑗秦冉顏何鄭康成范甯宜增祀者二十人縣亶牧皮樂正子公

都子萬章公孫丑諸葛亮尹焞魏了翁黃幹陳淳
何基王柏趙復金履祥許謙陳澠羅欽順蔡清陸
隴其入崇聖祠者一人張廸宜增置博士者四人
冉雍冉伯牛子張有若

上諭曰朕念先賢先儒扶持名教羽翼聖經有關學術人
心爰命九卿詳議今諸臣參考周詳評論公正甚合朕
心著依議行

雍正六年戊申二月丁亥

上諭內閣朕惟風雨時若百物繁昌皆由誠敬感格

天心用能福佑下民時和歲稔而司天號令長養阜成風神之貺厥功允懋頻年以來朕虔祀龍神福庇蒼生歷有明驗因思古稱雨暘燠寒以風為本亦宜特隆祀典以答洪庥考之周禮大宗伯以禋燎祀風師虞書禋於六宗劉歆鄭康成之說咸謂六宗之內風其一也歷代各置壇兆至宋祥符間曾立風伯廟近代及本朝俱列南郊四配之中典禮具備今欲於都城和會之地特建廟

宇因時禱祀以展朕為民祈福之誠其考據禮儀相度營建之處著禮工二部會同內務府詳議具奏

三月癸丑

上諭禮部光祿寺

陵寢祭祀銀器等項向從光祿寺臨期運送此器皿關係祭祀大典路遠運送往返恐不潔淨且或致有損傷殊非誠敬奉祀之意况每逢祭祀運送未免徒費跋涉其作何辦理之處著查議具奏

雍正七年己酉正月庚申

上諭禮部山川之神錫福於地方百姓是以自古帝王皆誠心展祀以答神貺即如向來盛京之地旱潦不時者凡六載康熙五十九年朕奉

皇考命躬詣

祖陵道經山麓謁北鎮廟潔蠲致祭因捐貲庀工載修廟宇囑令地方官員虔恭致祭自康熙六十年以至於今盛京年穀悉登豐稔又如黃河之神虔誠禱祀果見安

瀾有慶萬姓寧居皆神祇垂佑顯然昭著纖毫不爽者
此蓋以目前一二事而言其他難以枚舉也古稱江海
為百川之長而湖廣境內西南數省之水匯入大江又
為川澤之總會凡屬地土民人及舟楫行旅皆仗江神
默佑保護安寧允宜修建廟宇按時致祭以崇報享著
湖廣總督會同湖北湖南巡撫確查妥議南北兩省應
於何處各建廟宇或舊有祠廟敬謹興修皆動支公帑
辦理此朕虔禱神祇護國佑民之意並非諂媚以求一

已之福也并令該督撫曉諭居民不得私結社會妄事
祈求以滋褻慢

二月壬辰

上諭內閣朕惟雲雨風雷之神代天司令俾百昌萬寶普
含膏澤以錫福於烝民厥功並懋朕恭承

天眷恪修祀典為四海蒼黎仰祈嘉佑已經特建廟宇崇
祀龍神風伯而雲師雷師尚闕專祠嘗考虞書禋於六
宗之文漢人以乾坤六子釋六宗震雷巽風均列禋祀

而易曰雷以動之風以散之則風雷之發生萬物功實相等禮記曰天降時雨山川出雲周禮亦以五雲辨年歲是雲與雨皆運行造化同昭

天貺者也前代及本朝

南郊大祀雲雨風雷俱列從壇之次式隆配享典禮亦既備矣邇年以來雲物兆祥雷行應候茂育庶彙宣布陽和庇國佑民之德靈應顯然今欲特建廟宇虔奉雲師雷師之神因時禱祀敬迓洪庥以展朕為民祈福之意

其考據禮儀相度營建之處著禮工二部詳議具奏

丙申

上諭內閣朕於興修闕里

文廟一事盡誠盡敬頒發國帑務令規模宏壯堅固輝煌計日告竣雍正三年六月即敕令原任巡撫陳世倌領帑興工遴員修造拳拳委託至再至三嗣於塞榜額接任之時又復諄諄訓諭豈料陳世倌委用不得其人既已耽誤於前而塞榜額又復因循怠玩於後以致工

程遲滯久未告成昨已特遣通政使留保前往協同署撫岳濬督催令在事人員殫心竭力迅速竣事陳世倌著速赴東省盡心辦理以贖前愆此次修理

文廟工程務期巍煥崇闕堅緻壯麗纖悉完備燦然一新倘舊制之外有應行添設者有應加修整者俱著估計奏聞添發帑金葺理丹雘工成之日朕當親往瞻謁以展尊禮

先師至誠至敬之意

八月丙寅

上諭工部朕惟古聖人之制祭祀也凡山川嶽瀆之神有功德於生民能為之禦災捍患者皆載在祀典蓋所以薦歆昭格崇德報功而并以動人敬畏祇肅之心也雍正二年浙江海塘潮水衝決朕特發帑金命大臣察勘修築并念居民平日不知畏敬明神多有褻慢切諭以虔誠修省之道令地方官家諭戶曉警覺衆庶比年以來塘工完整災沴不作居民安業蓋已默叨神佑矣今

年潮汐盛長幾至泛溢官民震恐幸而水勢漸退隄防
無恙此皆神明默垂護佑惠我烝民者也茲特發內帑
銀十萬兩於海寧縣地方敕建海神之廟以崇報享著
該督遴委賢員度地鳩工敬謹修建務期制度恢宏規
模壯麗崇奉祀事用答明神庇民禦患之休烈且令遠
近人民奔走瞻仰興起感動相與服教畏神遷善改過
永荷庥祥則於國家事神治人之道均有賴焉

九月甲戌

上諭內閣山東泰安州神廟奉祀東嶽泰山之神厯代相傳靈顯昭著佑庇萬民俾國家享昇平之福者明神之功德其來久矣遠近人民感荷默佑之恩焚香頂禮罔不虔肅其廟宇重修於康熙十二年距今五十餘年茲據署巡撫費金吾奏稱廟宇盤道有傾圯頽壞之處應加繕葺山路亦當修整著發內帑銀兩命內務府郎中丁皂保赫達色前往督工敬謹修理務使廟貌輝煌工程堅固速行告竣以副朕為民報享之至意

雍正八年庚戌四月丁未

上諭內閣古稱黃河之神上通雲漢光啟圖書禮曰三王之祭川也皆先河而後海惟神澤潤萬國福庇兆民自古及今功用昭著我朝自定鼎以來仰荷神庥尤為彰顯或結為冰橋以濟師旅或淤成沃壤以惠黎元或湧出沙洲作天然之保障或長就堤岸屹永固之金湯他如濟運通漕安瀾順軌有禱必應無感不通至於澄清六省之遙閱歷七旬之久稽諸史冊更屬罕聞神之相

佑我國家者至矣朕敬禮之心至為誠切因念江南河南等處皆有廟宇虔恭展祀而河源相近之處向來未建專祠以崇報享典禮亟宜舉行查河源發於崑崙地隔遙遠人稀境僻其流入內地之始則在秦省之西寧地方朕意於此地特建廟宇專祀河源之神敬奉烝嘗以答神貺其如何加封神號及度地建廟一應典禮著九卿悉心詳議具奏

雍正十年壬子三月乙丑

上諭內閣直省各府州縣設立壇墀致祭

社稷及風雲雷雨山川城隍之神每歲春秋展祀以崇報
享典至重也從前初建之時有司或視為具文規制未
必周備及歷年既久漸有傾圯之處又未必及時修葺
是以僻遠之郡縣規模簡畧禮儀草率者往往有之甚
非肅將禋祀之本意也著禮部查照定例行文各該督
撫轉飭府州縣敬謹如式修理以重祀典仍令造冊報
部每遇該管官員陞遷事故俱照

先農壇忠孝節義祠例入交盤項內查明接受則有司自顧考成經理益加虔恪矣

雍正十一年癸丑六月庚午

上諭內閣祀事修明國家令典

孔子文廟春秋祭儀尤宜備物盡敬聞外省州縣中有因荒裁減公費者朕思公費既減必致祭品簡畧或轉派累民間二者均未可定著各省督撫查明所屬若有因荒減費之州縣即於存公銀內撥補以足原額務令

染盛豐潔以展朕肅將禋祀之誠其各凜遵毋忽

雍正十二年甲寅十月甲子

上諭內閣

壇

廟乃祭典攸關俱當潔淨嚴肅

太廟

社稷更宜恭敬故派太監等專責以掃除之事又派旗員輪班看守若非祭祀之日一應官員不許擅入原係定

例近聞在內住宿之太監等將伊等親友縱令出入行走看守之旗員亦將親友引入廊院乘涼此皆平日懈弛之所致也著交禮部太常寺嚴查禁止割草之人令太常寺酌量選擇數名令其敬謹除治並交與內務府御史等不時稽查如有容留閒散人等混入者即行指名題叅嚴加治罪如仍前懈怠經朕聞知定將禮部太常寺堂官及御史等一併交部議處

大清世宗敬天昌運建中表正文武英明寬仁信毅大孝
至誠憲皇帝聖訓卷三十二

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十三

篤勲舊

雍正元年癸卯九月丙午

上諭內閣朕惟我

太祖高皇帝天錫智勇肇造鴻基

太宗文皇帝繼業恢圖布昭聖武

世祖章皇帝統一寰區功成治定其時内外文武勲舊臣
工戡亂効力茂著厥功

皇考聖祖仁皇帝特敕內閣翰林院諸臣纂修

三朝國史用揚

列祖之鴻謨並及諸臣之勞勩迄今尚未編輯矧惟

聖祖仁皇帝垂統六十餘年以守兼創

恩澤聲教遠及海外絕域

德業之盛超於百世凡於指授所及能顯立功勲誠敬任

事之大臣與夫軼羣出衆有才之人若不及今博採聞見薈萃成編恐閱世久遠或致闕畧著將國初以來文武諸臣內立功行間誠敬任事卓越之才有應傳述者行文八旗將諸王貝勒貝子公以及文武大臣之冊文誥敕碑記功牌家傳等項詳加查核暨有顯績可紀者亦著詳察逐一按次彙成文冊悉付史館刪去無稽浮夸之詞務採確切事實編成列傳如此可以垂之萬世庶為國家宣力有功之大臣不致泯沒矣

雍正二年甲辰六月癸未大學士王頊齡年老乞

休

上諭曰卿學識優裕品行端雅增重巖廊年雖耄耋體素康寧今力辭祿位朕弗忍焉即不獲已而諒闇之年卿其可不強留耶蓋一日之留勝千里之睽也卿當少安體朕眷舊之至意又

諭內閣諸老臣皆係

皇考簡用胎朕之人如因衰老休致朕心不忍大學士王

項齡著仍在內閣辦事年邁之人間時行走可也

十月乙亥

上諭吏部八旗世襲官員如因罪革退不准其子孫承襲
應令伊嫡親兄弟承襲若無嫡親兄弟即襲與親兄弟
之子孫如兄弟亦無子孫者將原立勲績之處及獲罪
緣由與原立功人之子孫一併查奏其應否承襲之處
俟朕閱定如此庶為國家宣力之人不至泯沒矣

雍正三年乙巳六月乙亥

上諭領侍衛內大臣公馬爾賽等爾等俱係勲舊大臣之子孫孰不當為國家効用乎但今擇人任用大臣等之子孫內能勝任者不可驟得今大臣之子及散秩大臣侍衛等之子內爾諸臣有知其善者即行舉奏縱不深知訪問於章京護軍校等如得其人亦行舉奏以備朕之試用如此則人各加鼓勵矣且今大臣等多有不教其子弟者雖不教以漢書即教以清書亦可得明義理乃其中家資豐裕者並不黽勉正務而習為嬉戲此皆

不教之所致也其家道窘乏者又無教訓之力以致子弟往往陷於不才爾諸臣公同將上三旗勲舊世臣如公侯伯精奇尼哈番阿思哈尼哈番阿達哈哈番及登城巴圖魯等之子自二十歲以下十四歲以上或十二三歲而身軀長成者亦同揀選開明伊等履歷帶領引見朕量酌其宜加教訓成就之處另降諭旨

雍正四年丙午正月乙卯

上諭吏禮二部原任禮部尚書顧八代品行端方學術醇

正昔蒙

皇考簡用服官有年當征勦吳逆時以學士協贊軍務從將軍莽吉圖賴塔等克復粵西滇南勞績茂著備承

恩眷擢授秩宗且深知其品學優長足為模範

特命為朕兄弟之師朕自幼與共朝夕講論忠孝之大義研究經書之至理肫誠周至獲益良多嗣以公事誥誤罷職仍在內廷課讀數載後因抱疾遂就閒居於戊子之冬物故是時朕親臨其喪並遣人經理殯葬本欲陳

情於

皇考之前求加恩賜卹適值

聖體違和不敢賡奏迄今回憶當年誦讀情景宛然如昨
老成舊學時眷於懷應加優贈卹以展朕篤念師資酬
獎前勞之至意爾部會議具奏

五月己酉

上諭領侍衛內大臣等朕思教育三旗之記名功臣子孫
若令伊等在一處讀書則教授之人必不加勉而衆幼

童聚於一處亦不得實在肄業將此內二十歲以上曾習清漢書者爾等查明各與二兩錢糧米石令在部院為貼寫筆帖式令該管大臣將優者保奏以筆帖式補用若二十歲以上之不曾讀書者照護軍與四兩錢糧米石令在捕牲執事人處行走併給養馬錢優者即可用為侍衛或補授官職其十九歲以下者如在家能延師教訓無庸併及其餘每月與四兩錢糧以為延師肄業之費此次恩施並將大臣等之子孫一體均沾交伊

等父兄令將子弟之文武學業加意教訓俟伊等至二十歲時奏聞朕所以如此施恩者凡欲成就功臣之子孫也伊等父兄理宜仰體朕意各自諄切教其子弟庶伊等之文武學業俱得漸進以底於成就矣

雍正五年丁未五月庚申

上諭內閣朕覽治河方畧見原任河道總督靳輔昔年修理河工勞績茂著欲加恩澤以獎勲庸據該部查奏靳輔於康熙四十六年已蒙

聖祖仁皇帝加贈宮保給與世職今著追贈工部尚書銜
予祭一次以示朕篤念前勞至意

八月癸卯

上諭大學士等

皇祖妣

皇妣外家俱有世襲公爵

孝誠仁皇后外家之公爵因常泰獲罪奉

皇考諭旨革退而彼時未令承襲者

皇考或有深意存焉今可著常海之子倫布承襲再原任都統賴塔當三逆變亂時伊統兵征勦克復雲南功績懋著朕恭閱

聖祖仁皇帝實錄備悉其詳因伊身有過犯其功過適足以相抵是以未封公爵給以阿思哈尼哈番在國法實為允當且當日之不優封賴塔者欲使立功之人咸知儆惕收歛不可恃功驕肆妄為今事歷多年後人已知鑒戒奉法著將賴塔追封為一等公令伊孫博爾屯承

襲以示朕眷念舊臣之至意

十一月丁卯

上諭內閣

聖祖仁皇帝常稱巴圖魯公鰲拜効力處甚多厥功甚大因犯重案不得已將伊治罪伊孫達禮善朕甚望其成立欲加恩育但伊人甚平常行止不堪可惜不能承朕恩眷當時

諭旨如此朕數十年來惟聞鰲拜僭妄無禮擅權作威之

罪未深知伊之功勲併不知鰲拜子孫現在者何人昨引見達福時方知達福人去得朕又恭閱

聖祖仁皇帝實錄鰲拜所効功績每多超衆之處是以康熙五十二年

聖祖特命查鰲拜之子孫加恩賞給一等阿思哈尼哈番皇考既已施恩寬免鰲拜之罪應將鰲拜効力所得一等公爵給達福承襲世襲罔替仍授為散秩大臣鰲拜著致祭一次至建立石碑加恩等處交該部查例具奏

雍正六年戊申七月乙亥

上諭正紅旗漢軍都統等原任大學士寧完我乃國家舊臣朕念伊功績查伊後人其三世孫寧蘭人老成若有驍騎校缺出帶領引見寧蘭家貧賞住房一所內庫銀五百兩四世孫寧邦璽人平常係康親王屬下交與康親王給伊拜唐阿錢糧若能習文即令其讀書倘不能習文則挑在拜唐阿上教導行走成就時著王奏聞

九月癸丑

上諭內閣原任南陽總兵官李永陞向以居官不職收受軍政陋規經接任官叅劾部議革職治罪朕令發往阿爾泰驛跼坐臺効力今年春間朕恭閱

聖祖仁皇帝實錄見原任四川總督李國英擒勦逆寇勞績茂著因命查其子孫帶領引見彼時將伊孫李永安授為副叅領併知李永陞即李國英之孫特從臺站地方調回授為叅領面諭之曰爾不自念爾之祖父勉為好官朕心實不忍忘爾祖父之勞績也今特加恩宥仍

予錄用爾其思之勉之昨該旗奏伊名下應追未完銀兩伊情願變產扣俸完納朕又降旨免追矣大凡官員等之祖父為國家宣力抒誠致身殉節者其子孫應體祖父之忠心倍加黽勉以紹家聲斯不愧名臣之後若犯法婪贓虧空國帑不修名節有玷家風是不忠之外又加不孝之罪以情理論之應加倍重懲然朕繼述

先志褒功獎善追維往昔時時眷注於懷是伊等不肖之子孫忍於自忘其祖父而朕則不忍以其子孫之不肖

遂忘其先人之善不加恩於其後嗣也著八旗通查凡有祖父陣亡盡節及偉績殊勲載在國史而子孫犯法問罪及虧空拖欠者無論已結未結著該旗大臣等秉公據實確查具奏又漢人中如嵇曾筠之父錢以壇之祖抗節捐軀舍生取義已荷國恩優加榮獎又如趙申喬楊宗仁清廉公正乃國家實心任事之大臣其任內一切應賠銀兩朕已概從寬免無使絲毫牽累著各省督撫等確查所屬有居官清正如趙申喬楊宗仁湯斌

陳瓚張伯行之比而其子孫犯法問罪及虧空拖欠者無論已結未結俱行秉公據實具奏若其祖父係陣亡盡節者亦照八旗例查奏

十二月甲午大學士朱軾以積疴未痊奏請解任
調養

上諭曰卿才具優長品行端謹老成練達勤敏和衷朕所深知正資倚任今偶患咳嗽之症自可從容調理待其痊可向來漢大學士多用二員現今閣中有大學士張

廷王蔣廷錫二人辦理實無曠缺卿當頤養之時必須寬懷澄慮不以事物櫻心自然藥餌有功漸次平復以慰朕之殷懷今若以久未入直仍慮及內閣職務雖矢心匪懈具見卿之惓誠而思慮紛縈殊有乖於調攝之道朕昨以卿抱病多時特遣內大臣前往看視聞卿於內大臣之前力疾叩謝禮數繁多甚覺勞頓次日清晨又至宮門謝恩是轉增朕心之不安於義深為未協朕知卿素性拘謹舉動備極小心是以比來一切飲饌服

食之類未便頻頻頒賜正所以冀卿之安逸望卿之速痊也嗣後宜恪遵朕訓時加頤養導引中和節勞靜攝即受朕恩賚亦免其拜跪始於病體為宜卿年尚未老若調攝有方自然全愈為朕宣力之處甚多此時不必以解退陳情用是特手書諭旨賜卿其悉朕惓惓之至意

雍正七年己酉正月丁巳

上諭內閣滿漢內閣大學士俱各全備辦理事務亦甚屬

妥協無容再為增添朕因

聖祖仁皇帝時所有年久老臣目今在朝者甚少時深注
念禮部尚書陳元龍左都御史尹泰厯事

聖祖仁皇帝多年屢經任使今雖年近八旬而精力尚健
特加恩授為額外大學士以示朕優眷老臣成全耆舊
之至意

二月己亥

上諭內閣馬蘭泰之祖明安原係兀魯特部落貝勒

太祖高皇帝時納款歸順在軍中亦甚効力建立功勲授為二等伯現今馬蘭泰承襲朕念明安當年勞績格外施恩著封為一等侯令馬蘭泰承襲世襲罔替

雍正八年庚戌二月庚子

上諭內閣我國家膺圖受命則有佐命元臣際會風雲開拓疆宇至於承平之世亦有勞臣宣力綏靖不庭凡厥鴻猷駿烈焜耀旂常於是酬庸獎功錫以公爵分為一等至二等三等以第其勲勞表其閎閎比於古者河山

帶礪之盟爰及苗裔永久勿替甚盛典也朕考古封爵之制漢唐以來公侯皆繫以郡縣之名而漢世功名顯著者則加以美號如信武冠軍建忠定遠之屬並以榮名垂光史冊本朝封王者選用嘉美字樣其嗣王襲封皆因之而公爵則但分等次未有封號字樣朕意欲考其當日勲庸錫以嘉名追加為某公使勲勞之臣顯功丕績常赫赫在人耳目間而其子孫承襲封號亦皆顧名思義共知奮勉世為國家効忠抒力期踵美前人之

先以副朕褒念勲舊之至意至於宗室外戚則倣古恩澤侯之例命為奉恩公或承恩公以昭寵錫其如何命名定制並將歷來功臣勲戚加錫美號之處該部詳查定議以聞

雍正九年辛亥十一月己卯

上諭八旗都統等八旗漢軍兵丁技藝俱未嫻熟皆失於訓練所致今於額數之外挑選丁壯二千名另設一營教習訓練務期精銳再八旗漢軍勲舊大臣等子弟因

其父兄失於教導甚乏可用之才朕心深為憐憫現今尚耿石李佟祖蔡王諸家之子弟無論在京在外其年至十五歲以上二十歲內外者著揀選帶領引見朕量其才器令其學習行走日後俾得成就以副朕加恩造就勲舊子弟之至意

雍正十一年癸丑十一月戊戌正藍旗漢軍都統公慶復等遵

旨議覆八旗世職絕嗣人員有以近族遠族子孫為後者

有以親戚收養為後者應分別降等令其承襲至墳墓在

盛京及不知墳墓所在者既無人承管祭奠應無庸

承襲

上諭曰朕加恩絕嗣人員為之立後賞給世職令其承襲皆念伊等勲勞不忍聽其血食斷絕也其墳墓在盛京而承襲世職之人在京當差者如情願往盛京居住即令移往盛京隨彼處當差至不知墳墓所在者亦可立

墳祭奠著一體加恩賞給世職令其承襲

大清世宗敬天昌運建中表正文武英明寬仁信毅大孝
至誠憲皇帝聖訓卷三十三

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十四

褒忠節

雍正二年甲辰十月癸未

上諭九卿詹事科道等朕惟周禮有司勲之官凡有功者
書名太常祭於大烝祭法曰以死勤事則祀之凡以崇
德報功風勵忠節也

太祖高皇帝肇造鴻圖

太宗文皇帝式廓區夏

世祖章皇帝奄有萬邦自創業以至定鼎將帥之臣致命立功者不少

聖祖仁皇帝臨御六十一年中間殲滅三逆永清朔漠以及平定西藏臺灣雖天戈所指如疾風振槁而師旅之臣捐軀馬革及守土之官見危授命者所在多有邇者青海蕩平西域効順然自用兵以來將士奮勇前驅亦

有歿於行陣者此皆盡忠報國之臣朕甚嘉之亦甚憫之當於京城建立祠廟春秋妥侑其偏裨士卒力戰敵愾舍生取義者亦附列左右用以褒崇大節揚表芳徽俾遠近觀聽勃然生忠義之心於治道亦有裨益仍令翰林官纂其籍貫事蹟各為立傳彙成一編垂諸永久爾等悉心詳議具奏

雍正七年己酉五月壬戌

上諭內閣自本朝開國及平定三藩廓清朔漠以來褒忠

錄功之典最為優渥凡文武官弁兵丁之効力行間著有勞績及臨戎致命遇敵受傷者皆赤心報國之人朝廷沛澤加恩惟恐不速乃近年以來部臣辦事遲緩因循往往因一二事之駁查遂將衆人卹賞之典俱致淹滯卽如陝甘川省從前攻剿南川北川青海桌子山等處之文武官弁兵丁已經查核明晰應行卹賞議敘祇因青海等處功加冊結內有原任巡撫王景灝同知張梅華職離任所造冊結無印可鈐部議駁查以致南川

等案卹賞之處一并稽延經朕訪察而後知之夫官弁例應議敘者不得早沾國恩固為不可而陣亡受傷人等遲至數載之後尚未邀帑金之賜尤可憫惻著該部速行卹賞議敘嗣後凡有出兵加恩之案其中若有應行駁查者止將應查之人扣除俟查明補給不得因一二人之行查而稽遲衆人應得之恩典將此永著為例又如從前進藏出征之官弁兵丁若有預借銀兩而本身陣亡或在軍中受傷病故者除照例卹賞外其所預

借銀兩槩免追還

十月己未

上諭禮部雲貴廣西總督鄂爾泰忠誠體國經理苗疆勲績懋著伊曾祖圖捫於開國時奮勇陷陣効命疆場忠節炳然垂光衍慶積於其孫鄂爾泰為不世出之良臣祖孫忠良後先輝映朕甚嘉焉今鄂爾泰奏稱曾祖圖捫與祀昭忠寺牌位列銜佐領請將苗疆議敘之案移賞曾祖祖父誥封等語著將鄂爾泰之曾祖祖父俱照

總督加內大臣兵部尚書職銜給與一品誥封其昭忠寺牌位改書新贈之銜入於大臣之列鄂爾泰苗疆之案仍著議敘

十一月戊寅

上諭內閣從來開國之初必有從龍之佐或闢疆拓土茂建崇勲或陷陣衝鋒捐軀殉節至於承平之後伐叛討逆其抒誠宣力之臣壯猷忠節竝足以垂光竹帛流譽無窮為人上者無不存篤念忠勲之心於本身厚加贈

卹尤切望其子孫克紹前徽永受優待功臣之澤為之子孫者自當謹守家風努力奮志砥礪廉隅世世為國家有用之材以繼述先烈卽或貧窶不能自振國家自必加以恩澤周恤其身家而不至於困苦無依也乃功臣之後往往有不肖子孫自甘敗類或謀私結黨欺君誤國或貪贓壞法虧空國帑陷身刑辟以致發遣遠邊妻子入辛者庫在國家之法雖宗室懿親亦不能曲為寬宥豈能於忠節之子孫別開寬假之路乎此等之人

不念先人之心跡以致深負國恩非惟不忠更兼不孝其祖父有知亦應深惡而痛絕之且國家遇此等人寬之以恩則法有所不伸置之於法則情有所不忍為君者實處兩難之地其人之罪尚可言乎然伊等忍於負國而併忘其先人朕豈忍不念舊勲而不推恩及其後裔上年降旨令各旗將功臣之子孫內有犯法問罪及虧空拖欠者一一查出具奏今年各該旗陸續查奏前來朕詳加披覽斟酌情罪或其中勲節之後嫡派止此

一二人者如施世驊等共六十二員名下應追未完銀共五十四萬六百九十五兩金五百兩米一千七百二十一石此各項錢糧俱係國家公帑非朕所得私自用恩豁免者著將內庫銀兩照數撥補代為伊等完項其或擬以充發監候及妻子家屬入辛者庫等罪者槩行寬釋凡此邀恩宥貸之人皆當捫心自愧刻骨銘肌并勉其子弟遷善遠辜毋或仍蹈故轍倘有過犯豈能再邀倖免凡屬忠節之子孫皆當以此為戒共加奮勉倘

因此次格外之恩或生玩法之念是朕之加恩不能勸人為善轉至導人為非矣豈不重負朕念舊懷忠之至意乎凡此寬宥人等倘有貧乏不能自給者准其於該都統處具呈俟該都統奏聞朕當另加恩卹以存養之

雍正八年庚戌六月乙丑

上諭宗人府怡親王第三子弘噉朕指配富察氏尚未婚娶而弘噉病故富察氏聞信卽慟哭截髮至王府懇求持服守制彼時怡親王不允富察氏於門外跪哭以夜

繼曰王始終未允并未遣人與彼一語王之意以王子已故不忍再誤富察氏之終身也乃富察氏歸至母家持服守節二年以來之死靡他今年吾弟薨逝富察氏又至王門悲慟銜哀懇求服孝從前之事吾弟竝未奏聞今王之管事人員以應否准其服孝奏請朕始知之遂降旨准伊服孝令進王府諭王妃收以為媳富察氏以幼年之女能知大義矢志栢舟其情可憫其行可嘉弘燾身後一應禮儀俱照貝勒之例著於弘燾親姪內

以一人為弘敷之嗣卽襲封貝勒令富察氏撫養俾其
無子而有子以彰節女之厚報焉

七月戊寅

上諭內閣國家効忠宣力之臣勲績茂著必膺崇報之典
令其世享烝嘗雍正二年朕已敕建昭忠寺自開國以
來致命立功盡忠報國之儔皆得春秋妥侑世世血食
顧念古者大烝之祭凡法施於民以勞定國者皆得並
列祀典永受明禋則我朝名臣良弼其經邦佐治黼黻

昇平者皆祭法所必登朕欲為之建立祠宇久矣卽如
怡親王之精白一心忠誠體國勲在

社稷澤被生民其功德隆盛又豈一切効忠宣力者之所
可比倫乎洪惟

太祖

太宗創業垂統厥有一德佐命之良

世祖撫綏萬邦實多奮庸熙載之彥迨我

聖祖臨御六十餘年其間良臣碩輔後先相望據朕所深

知者舉其一二如大學士公圖海公賴塔大學士張英
尚書顧八代馬爾漢趙申喬河道總督靳輔齊蘇勒總
督楊宗仁巡撫陳璘等持躬正直奉職公忠或垂節鉞
之勲或勵冰霜之節俯仰無愧為朝野所共欽終始不
渝無瑕疵之可指似此等靖共爾位不愧古大臣之風
者正不乏人既樹羽儀於一世宜隆俎豆於千秋且使
世世為臣者觀感奮發知所慕效羣以臯夔稷契共相
期待則明良喜起之盛朕於斯有厚望焉著於京城內

白馬關帝廟之旁選擇吉地特建廟宇命名賢良祠春秋以時展祀其應入祠之員著內閣會同該部確查本朝滿漢文武大臣才德著聞完名全節者詳慎開列具奏請旨將來繼起之臣亦併得沾被恩光永為盛典

十一月丁亥

上諭內閣各省選拔生員到京朕俱特派大臣秉公考試分別等次進呈前有湖北應山縣生員楊可鏡一卷文理荒疎經部議照例革去選拔項朕聞楊可鏡乃明臣

楊漣之元孫昔順治四年楊漣之子楊之易為江南松江府同知遭提督吳勝兆之叛捐軀殉難忠節凜然蒙世祖章皇帝之恩優加贈卹此卽楊可鏡之曾祖也朕思楊漣父子兩世忠義其後嗣子孫若稍能自立品行無虧雖文藝不工亦當格外造就楊可鏡准作選拔赴國子監肄業仍著禮部帶領引見

雍正九年辛亥正月乙亥

上諭大學士等準噶爾賊人乘我西路軍營不備傾其醜

類犯我卡倫盜赶駝馬總兵官樊廷等領兵二千轉戰七晝夜擊殺賊衆又將盜去駝馬牲畜奪回樊廷忠勇冠軍頗得勝算總兵張元佐副都統綽般台吉袞布三等台吉定匝拉錫領兵應援奮力夾攻大敗賊人副將張朝良以孤軍被困而能全師出圍凡此將弁皆見義能勇致身効力均屬可嘉樊廷著賞銀一萬兩給一等阿達哈哈番張朝良治大雄俱著賞銀五千兩給拜他喇布勒哈番張元佐綽般俱著賞銀三千兩給拖沙喇

哈番台吉袞布著封公爵三等台吉定匝拉錫著授為
扎薩克一等台吉其餘有功將弁俱著大將軍岳鍾琪
查明奏聞加恩從優議敘再著署內務府總管鄂善馳
驛前往肅州於軍需銀兩內動支十萬兩令大將軍將
此番出征弁兵等查明戰功等第按名賞給至陣亡將
弁兵丁分晰查明造冊具奏從優賞卹該督撫動用正
項錢糧於安西地方建立忠勇祠將陣亡之將士等設
造牌位致祭俾義烈將士永遠流芳以示朕崇獎忠勲

之至意

甲申

上諭大學士等準噶爾賊衆侵犯西路汎界盜竊駝馬乘
我不備事起倉猝其力戰克敵者甚屬可嘉而授命疆
場者尤為可憫前已降旨令建忠勇祠春秋祭享以表
忠節矣茲應賞給世職令其子孫承襲永誌恩施副將
徐宗仁著給與拜他喇布勒哈番守備劉貴才劉芳雨
李國勲俱著給與拖沙喇哈番其應得卹典仍著該部

察例具奏千總王大謨徐維新外委把總方正劉世勲俱著該部從優議卹此外如有應加恩卹之弁員俱著大將軍岳鍾琪查明具奏凡陣亡兵丁於卹賞定例之外俱倍加賞賜其隨役人等有受傷亡故者照兵丁卹賞定例給賞朕今以酒三爵遙酌陣亡將士著署內務府總管鄂善將酒齋往軍營凡陣亡將士每名以羊一隻奠祭宣朕憫惻傷悼至意朕不得已而用兵本期全師克敵不損一人乃為至願豈必捐軀致命始稱効忠

報國乎今此陣亡弁兵朕雖加恩優卹而惻怛不忍之
念愈覺難釋於懷著鄂善將朕諭旨徧行宣布令衆知
之至所賞賚銀十萬兩鄂善至軍營時或與大將軍岳
鍾琪或與護大將軍印務紀成斌分別將弁兵丁建功
出力之等次秉公賞給務使均霑恩賜以示國家酬庸
獎勲之令典

雍正十年壬子二月辛卯

上諭內閣我朝從前文武大臣持躬正直奉職公忠樹績

建勲完名全節者朕已降旨於京師賢良祠永遠展祀以彰令範因思外任大臣鎮撫封疆宣猷布化忠勇効命威愛宜民其政績卓然可紀者若於身故之後建立賢良祠俾得永膺祀典旣足慰兵民懿好之公亦足為後來居官者之勸如近日之將軍蔡良提督張起雲總兵蘇大有魏翥國皆素有賢聲勤勞王事而歿於官者允宜在賢良之列著直省各於省會之地建立祠宇其與祀之人卽從近年為始向後凡有應請入祠者該地

方督撫於一人各具一本請旨不必彙奏

五月庚辰

上諭兵部去年六月準噶爾賊夷犯我北路弁兵奮勇進
勦遂致失利其效力之官員兵丁已降旨軍營著優加
賞賚至於陣亡之大臣官員兵丁今據大將軍順承親
王詳查造冊送部此陣亡人等皆荷國家歷年養育朕
原欲伊等建立偉功以膺國家重賚伊等世受國恩篤
思報効勇往直前以致身陷疆場雖誤入危機而致命

効忠誠切可憫朕自聞報以來至今中心悽惻難釋於懷著交該部按冊詳查應加贈廕及祭葬賞卹之處照例分別詳議具奏

雍正十一年癸丑正月戊戌

上諭內閣大定副將楊馥統兵擊賊奮勇先登為暗鎗所傷其忠義之氣甚屬可嘉伊子楊恒新現在軍前技勇頗優亦甚有志氣著授為遊擊不必在軍前効力遇有遊擊缺出卽行題補平越營遊擊羅資袞以帶兵應援

勇往被害深可憫惻伊子羅雲標現在隨征効力著授
為守備該督等酌量題補至楊馥羅資袞應得卹典俟
事竣題報到日仍照例賞給



大清世宗敬天昌運建中表正文武英明寬仁信毅大孝
至誠憲皇帝聖訓卷三十四

欽定四庫全書

史部

世宗憲皇帝聖訓卷三十五

六五

臣 永瑤 恭 校

編修臣 裴謙 覆勘

總校官原任中允臣王燕緒

校對官中書臣王 瓚

謄錄監生臣湯安泰

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十五

綏藩服

雍正元年癸卯正月丙戌

上召來京叩謁

梓宮之科爾沁達爾漢親王和碩額駙羅卜藏滾布等入

養心殿

諭曰爾等先世俱在

太祖時歸誠効順竭力同心誼若一家懋著勤績爾等皆

深沐

皇考加恩愛養之人今聞

皇考升遐叩謁

梓宮哀號擗踊朕心深為憫惻仰惟

皇考視爾等如子孫於茲六十餘年恩隆情篤今

龍馭上賓屬大位於朕躬朕仰承

皇考付託之重當視爾等亦如一家深加愛養爾等宜感
念

皇考深恩和衷共勵竭誠効力爾等衆扎薩克俱有辦理
旗務統轄衆庶之責凡事秉公矢慎各撫恤屬下人等
慎勿擾累

三月癸巳禮部議覆福建巡撫黃國材奏琉球國
進貢頭號船內貢使表文及方物一半沉海二號
船內彝目應准其返國令補具表文方物進呈

上諭曰琉球國進貢使臣毛宏健等所坐頭號船內人負俱衝礁覆沒甚屬可憫所失表文方物免其補進二號船內所存方物交與來使帶回仍准作進貢其賞給之處著察例具奏所賞之物行文該地方官賞給令其起程

四月乙卯

上諭理藩院爾衙門人負來往蒙古地方者聞有不肖之徒肆行無禮勒索陵虐夫外藩之與天朝不但扎薩克

王即台吉亦係賓客豈可令領催等卑賤之人肆其欺陵爾衙門嚴行申禁詳定條例嗣後永遠遵行

六月乙卯

上諭理藩院郭爾羅斯乏食爾等議將鄰近扎薩克公巴圖旗下倉糧撥給散賑等語殊未妥協若將此項倉糧撥給將來伊旗下儻遇災旱又將何處米石撥給乎朕思白都納貯存倉糧頗多可備散賑之用但止給與米糧餬口並無產業營生亦非久遠之計從前給產業買

牲餼之事俱將富戶派出以致苟且塞責所給之物浮報數倍蒙古並不得實惠夫科爾沁一旗與別部落蒙古不同

太祖高皇帝時首先臣服且為朕

皇曾祖妣孝莊文皇后

皇祖妣孝惠章皇后之母家世為國戚恪恭巽順歷今百有餘年今聞伊屬下之人乏食朕心軫惻著即動用正項錢糧三萬兩往賑再派出大臣一員司官一員往郭

爾羅斯旗下將實在窮苦並無牲餼之人查明數目按其戶口給與乳牛羊隻務令寬裕足用爾衙門會同總理事務王大臣速議具奏

丙子

上諭八旗蒙古都統等塞外居住之八旗察哈爾蒙古護軍驍騎之器械三年查看一次而前往之護軍參領驍騎參領等騷擾蒙古勒索馬牛等物其三年一往比丁之官員亦有勒索之處朕所洞悉再察哈爾蒙古內未

曾出痘者甚多若來京挑選護軍儻遇出痘恐有損傷嗣後察哈爾八旗護軍缺出即著察哈爾總管副總管參領公同閱看人材可用者挑補其挑補之護軍俟三年查看軍器時從京中奏派大臣一員前往查看軍器將所挑之護軍一併驗看其三年比丁亦照外省例交與該總管等詳察明白將比過丁數造冊送各該旗都統則衆蒙古無騷擾之患亦無往返京師之事於伊等大有裨益著八旗蒙古都統領侍衛內大臣前鋒統領

護軍統領公同議奏

七月辛卯

上諭禮部朝鮮國歸順我朝以來恪盡藩職進貢年久在
太宗文皇帝

世祖章皇帝

聖祖仁皇帝時屢次施恩將伊國貢物減免今所貢禮物
尚多此內若有可減去者爾部會同內務府確議具奏
再加減免以紓朝鮮民力

是日頒賜朝鮮國王李昫及使臣李檟等

上召使臣李檟進見諭曰爾朝鮮國王啟疆東土於我
太宗文皇帝時誠心豫附恪守藩封我

太宗文皇帝

世祖章皇帝視同一家恩施優渥爾國王祖父亦能仰承
厚澤奉職惟謹百年於茲矣我

聖祖仁皇帝化成久道萬國來王念爾國君李焞幼繼嗣
服克紹前猷權不下移惠能撫衆數十年來職貢匪懈

用是

隆恩異數寵眷有加賚予便蕃貢物頻減病則賜之以珍藥歿則錫之以榮名

特遣近臣優頒奠弔今朕纘承大統爾嗣王李昫遣爾恭進賀表朕嘉爾嗣王忱悃肫篤又念爾係嗣王宗族特行召見以示優禮爾歸告爾嗣王繼乃祖父之緒夙夜黽勉慎守綱維毋替厥服長為屏翰不忘恭順克殫忠誠朕必體

列聖怙冒弘仁俾爾遠藩保安於永久爾其識之

八月己巳管理藩院侍郎事都統拉錫奏喀喇沁等處歲歉乏食請於查覆到日賑濟

上諭曰據奏俟查覆到日加恩拯救現今乏食人等必至失所著戶部作速派官二員領銀五萬兩前往再著侍郎本錫副都統阿林保作速馳驛赴喀喇沁處俟錢糧一到即行散賑扎薩克八處俱一面清查一面給發毋得稽遲

丙子

上詣

景陵奉移

梓宮敬安

地宮率諸王大臣蒙古王台吉塔布囊等行禮舉哀畢

諭蒙古王等曰自爾先世歸附

太祖

太宗蒙被聖化於茲五六代矣世締國姻恩深祿重兄弟

主臣洽比保聚安居樂業百有餘年其間厄魯特噶爾丹猖獗弄兵破喀爾喀七旗侵及內扎薩克蒙古蹂躪遊牧之地

皇考為爾等三次自將出師乃滅噶爾丹使爾等永享太平之福六十餘年以來爾等屬下偶有饑饉災傷莫不發帑與糧資給畜牧更派富戶屯田代耕使饑者復安散者復聚

皇考養育爾等蒙古恩澤重矣大矣曩者郭爾羅斯以歲

饑聞朕仰體

皇考聖意即遣大臣前往發倉賑救賞給牛羊今喀喇沁
翁牛特八旗又以歲饑聞復遣大臣前往即速查明饑
口動用正項錢糧買米散賑夫一時阻饑朕雖賑之常
年貧乏之民在爾各君長於本旗內哀多益寡互相賙
恤以養育之庶幾得所耳若仍然厚歛重徭納之於阡
危之域使之至於散亡孰為爾等納賦孰為爾等供徭
愛民惠下是第一要務不可不知也連歲災旱頻仍今

年又遭饑饉爾等各子其民者如何減賦如何輕徭如何裕其農功如何葦其畜牧爾等王貝勒大臣等議定務使各得生理以仰副我

皇考聖心以慰朕心定議之後儻有顯背公議仍然重賦苛役者國法具在非朕所得而私也我

皇考目覩爾等長成愛如子孫事事包容處處軫恤爾等
視

皇考如祖父恃

皇考之慈愛每事懈怠朕新即位務須各盡爾職謹慎小心管轄屬下訓練兵丁嚴禁盜賊奉公守法循分安生仰報我

皇考軫愛之恩俾朕得以仰法

皇考慈惠爾等至意始終保全永永勿替朕之願也今日特於

皇考梓宮前諭爾等知之

九月丁亥理藩院奏扎魯特等處乏食請加賑卹

上諭曰著再給銀二萬兩交與本錫阿林保齎往此項因
從前發去銀五萬兩或有不敷添解備用並非分別此
一旗給與若干彼一旗給與若干也可將兩次銀兩合
數旗之人通行散給如有不敷再行請旨

雍正二年甲辰正月丁丑

上諭理藩院朕問貝勒博貝管轄之吳梁海人民近時何
以資生據奏在將軍祁里德處借餉一萬八千五百六
十兩買牲分給各得產業今勝於昔其所借餉銀伊將

俸銀逐年抵補等語朕思博貝歷年宣力勲績卓然且吳梁海等衆均係朕之百姓豈有養育朕之百姓而借餉於朕之理所借銀兩不必扣還著行文將軍祁里德知之

三月壬辰

上敕諭準噶爾台吉策妄阿喇布坦爾前者無故侵擾我哈密疆界罪在不赦

皇考聖意止令於邊地防守雖各路發兵原無勦滅準噶

爾之意也其後澤卜尊丹巴胡土克圖為爾奏懇

皇考欲施恩寬宥所以遣使楚楊託音等諭爾前年爾所遣使垂納木喀布厓等至澤卜尊丹巴胡土克圖處轉至總督年羹堯軍前送至京師朕定爾平生功罪開示大義面諭遣回今爾深省前非歸誠請罪遣使根頓同楚楊託音前來奏辭恭順得遂

皇考初心朕意嘉悅爾奏稱惟祈休養生靈闡揚正教為第一要務等語爾台吉不過準噶爾一部落之主尚欲

休養生靈闡揚正教何況朕為四海臣民之主普天之下皆朕土率土之濱皆朕臣乎用是特遣御前總管京城喇嘛班第副扎薩克大喇嘛達爾漢楚楊託音內閣學士衆佛保副都統扎錫喇嘛錫拉卜格春等宣諭若台吉果欲輯寧爾國尚其誠一乃心與朕所遣大臣等申定疆圻諸事循理妥議歸於和順朕必施恩軫念永加眷顧仍前通市使命往來爾台吉誠能以鮮終為戒其必惟和惟順無貳無疑披瀝悃忱以期永好不特克

協於朕休養生靈至意爾台吉遊牧地方亦永永無虞
安居樂業矣特此諭示並賜各色緞二十七疋爾其祇
承

四月戊申

上諭理藩院據蘇尼特阿霸垓阿霸哈納蒙古人等俱稱
連年災傷今又遭大雪牲餽俱已倒斃等語若差官查
奏始行加恩則現今乏食之人恐至饑餒著參領多索
禮侍衛納蘭馳驛前往查核發戶部帑銀二萬兩會同

阿霸垓公德木楚克逐一查明計算實在無畜牧不能度日者將此銀兩酌量散給均使霑恩

五月辛亥

上諭禮部兵部安南國王黎維禔遣陪臣范謙益等賀登大寶貢獻方物並三年歲貢從廣西桂林府水路進京朕因向來驛遞供應多有騷擾曾諭定例供給之外不許溢額應付今安南慶賀大禮遣使遠來應加恩恤其經過地方供給食物酌量增加令其充足以示朕嘉惠

遠人至意

十月己亥廣東巡撫年希堯奏暹羅國運米并進穀種等項

上諭內閣暹羅國王不憚險遠進獻稻種果樹等物最為恭順殊屬可嘉應加獎賚其運來米石令地方官照粵省現在時價速行發賣不許行戶任意低昂如賤買貴賣甚非朕體恤小國之意嗣後且令暫停俟有需米之處候旨遵行其壓船隨帶貨物一槩免徵稅銀來船捐

目徐寬等九十六名雖係廣東福建江西等省民人然
住居該國歷經數代各有親屬實難勒令遷歸著照所
請免令回籍仍在該國居住以示寬大之典

十一月己酉

上諭怡親王允祥外藩人等來朝給以食物及其歸國頒
以賞賜俱有定制但該管官負未免忽略遂使遠人不
需實惠朝鮮國守職恪順百年有餘今琉球來使亦甚
恭謹伊等歸國時一切應賞之物擇其佳者給與務使

得霑實惠嗣後除理藩院蒙古賓客外朝鮮鄂羅斯暹羅安南等國遣使來朝所給食物歸時所頒賞賜爾會同該部辦理或有應行加賞之處酌量定議奏聞

雍正三年乙巳四月己丑

上諭雲貴總督高其倬覽奏交趾舊界有遠近互異等情朕思柔遠之道分疆與睦鄰論則睦鄰為美畏威與懷德較則懷德為上據云都龍南丹等處在明季已為安南所有是侵占非始於我朝也安南自我朝以來累世

恭順深屬可嘉方當獎勵是務寧與爭尺寸之地况係
明季久失之區乎其地果有利耶則天朝豈宜與小邦
爭利如無利耶則又何必與之爭朕居心惟以大公至
正為期視中外皆赤子且兩地接壤連境最易生釁尤
須善處以綏懷之非徒安彼民正所以安吾民耳即以
小溪為界庸何傷貪利倖功之舉皆不可為訓悉朕此
意斟酌行之尋安南國王黎維禔奏稱臣國渭川州向
與雲南開化府接壤以賭咒河為界河之西歸開

化府河之東歸渭川州聚龍社忽接雲貴總督移咨臣國聚龍斜路村等六寨皆係開化屬內地向為都龍土目占侵至今四十餘年合行清立疆界臣已具文回覆隨有開化總鎮親來斜路村之鞍馬山去賭咒河一百二十里就立界牌設立房屋分兵防守臣備錄情由謹具奏聞

上敕諭安南國王此事王未奏之先雲貴總督高其倬方差負勘界之時即已摺奏矣朕念安南累世恭順王能

恪繼職守可嘉且此地乃棄自明朝安南之民住居既久安土重遷恐有流離之苦朕心存柔遠中外一視甚為不忍已批諭將斜路村等處人負撤回別議立界之地務期允當諒茲時所批已到必另有料理矣王但自共厥職以綏爾民靜候可也

十月癸酉

上敕諭西洋教化王伯納弟哆覽王奏並進貢方物具見
惻誠我

聖祖仁皇帝怙冒萬方無遠弗屆

龍馭升遐中外臣民悲思永慕朕繼承大統勉思紹述
前徽教化王地處極遠特遣使臣齎章陳奏感

先帝之垂恩祝朕躬之衍慶周詳懇至詞意虔恭披閱之
餘朕心嘉慰使臣遠來朕已加禮優待至於西洋寓居
中國之人朕以萬物一體為懷時時教以謹飭安靜果
能慎守法度行止無愆朕自推愛撫恤茲因使臣歸國
特頒斯敕並賜粧緞錦緞大緞六十疋次緞四十疋王

其領受悉朕惓惓之意

雍正四年丙午十月丁卯浙閩總督高其倬奏蘇
祿國王遣使表貢方物

上諭內閣蘇祿國遠在海外隔越重洋從來未通職貢今
輸誠嚮化甚屬可嘉閩省起送來京之時著沿途地方
官護送照看應用夫馬食物著從厚支給以示朕加惠
遠人之至意

丙戌禮部奏琉球國中山王尚敬為謝

恩遣使臣進表并貢方物應照例察收

上諭曰琉球國王因朕頒賜御書匾額及玉器綵緞等物特遣使臣進表謝恩貢獻禮儀具見誠悃朕加恩遠藩不欲收其貢物但既航海遠來不忍令其帶回本國著交內務府存留准作二年一次正貢以示朕體恤遠人之至意

十二月丙戌

上諭理藩院向來四十八旗王台吉派為兩班來往京城

伊等即有本地要務或身抱疾疴亦必前來交春始回
明歲冬季又復該班日期既近冬寒往返勞苦深可軫
念伊等內有願請朕安者當於草青時照常前來其年
例應分為三班二年一次俾伊等得以休息爾等議奏
雍正五年丁未十一月丁巳

上諭理藩院今年口外蒙古地方收穫甚豐科爾沁敖漢
等十六處扎薩克地方未能豐收宜加特恩科爾沁地
方五旗著賞銀三千兩交與現今在京科爾沁王羅卜

藏滾布貝子拉錫等帶去查明賞給教漢等十一處扎薩克地方著賞銀六千兩爾衙門派司官二員分兩路帶去會同各處扎薩克查明賞給再此等扎薩克各旗倉內現有存貯米糧其未能豐收者應如何酌量借給之處爾衙門議奏

雍正六年戊申正月己卯

上敕諭安南國王朕前令守土各官清立疆界原屬行之於內地未令清查及於安南也督臣高其倬以職任封

疆詳考誌書兼訪輿論知開化府與安南分界之處當在逢春里之賭咒河於是一面設立防汛一面奏聞比因該國王陳奏朕特降諭旨令該督另議立界又恐高其倬固執已見復命接任總督鄂爾泰秉公辦理鄂爾泰體朕懷遠之心定界於鉛廠山下小河一面設立防汛一面奏聞較之舊界已縮減八十里誠為仁至義盡此皆地方大臣經理邊疆職分所當為者也朕統馭寰區凡屬臣服之邦皆隸版籍安南旣列藩封尺地莫非

吾土何必較論此區區四十里之壤若該國王以至情懇求朕亦何難開恩賜與祇以該督臣兩次定界之時該國王激切奏請過於缺望種種陳訴甚為不恭該國王既失事上之道朕亦無從施惠下之恩此天地之常經上下之定體乃王之自取非朕初心也頃鄂爾泰將該國王上年十二月內本章呈奏知該國王深感朝廷怙冒之仁自悔從前執迷之誤踴躍拜命詞意虔恭朕覽閱之餘甚為嘉悅在王既知盡禮在朕便可加恩况

此四十里之地在雲南為朕之內地在安南仍為朕之外藩一毫無所分別著將此地仍賞賜該國王世守之並遣大臣等前至該國宣諭朕衷朕念已加惠藩王亦當俯從民便儻此地居住民人有情願遷入內地者已令督臣鄂爾泰酌量料理並諭該國王知之

二月甲申

上諭禮部朝鮮年貢之例每年貢米百石朕念該國路途遙遠運送匪易著減去稻米三十石江米三十石每年

止貢江米四十石足供祭祀之用永著為例

雍正七年己酉正月丙午

上諭蒙古王等朕思從前所定外藩扎薩克蒙古王等之俸祿比於內地王等較少者必非以內外之故遂有多寡之分也或因爾蒙古王等人負衆多且在外藩居住費用尚為儉約而國家錢糧亦或有不敷之處故將爾等俸祿從少定議耳今朕恭承

上天垂佑

聖祖仁皇帝貽庥天下太平無事數年以來屢登豐稔國家錢糧頗為饒裕朕為統馭天下萬物之主凡事當周詳籌畫而行爾蒙古王等以下扎薩克一等台吉以上之俸令著概行加增一倍賞給再平常一等台吉從前俱無俸祿今亦著照扎薩克一等台吉等所食百金之俸賞給此乃朕特行加恩爾等之處朕亦未敢遽為定例總以國家錢糧之出入數與不敷為定耳嗣後著戶部理藩院於每年歲底將仍給與原俸或加賞之處會

同具奏請旨朕於臨時酌降諭旨

七月己巳

上諭禮部暹羅國王遣使遠來貢獻方物具見惻誠朕念該國遠隔海洋所進方物齎送不易欲酌量裁減以示恩恤遠藩之意但此次貢物既已齎送前來難以帶回本國著照往例收納其常貢土物內有東香安息香袈裟布疋等在內府無須應用嗣後將此等免其入貢永著為例該部詳悉行文該國王知之

八月丁未福建巡撫劉世明奏呂宋夷船被風飄入閩廣地方

上諭內閣呂宋被風夷船既已開往廣東佛山著廣東督撫查照給與口糧加意撫恤聽其候風回國嗣後凡有外國船隻遭風飄入內地者俱著該地方官查明緣由悉心照料動支公項給與口糧修補船隻俾得安全回其本國以副朕恩恤遠人之至意

九月甲午雲貴廣西總督鄂爾泰奏附近雲南之

南掌國王島孫貢象二隻

上諭內閣南掌國遠在西南徼外從來未通職貢今輸誠
向化甚屬可嘉滇省起送來京之時著沿途地方官護
送照看應用夫馬食物著從厚支給以示朕加惠遠人
之至意

十月辛亥琉球國中山王尚敬遣陪臣毛鴻基等
表謝敕書蟒緞玉器

恩並貢方物

上諭禮部琉球地處重洋之外奉表修貢遠涉風濤朕心
深為軫念是以從前降旨令將雍正四年該國王謝恩
所貢儀物准作雍正六年正貢以示恩眷今該國王以
六年正貢之期仍遵定制遣使航海遠來奉表進貢情
詞懇切具見惻忱著將六年進貢之物准作八年正貢
若八年貢物已經遣使起程即准作十年正貢著行文
該國王知之

已未

上諭禮部朝鮮國王世篤恭順虔修職貢昔蒙

世祖章皇帝軫念藩封特頒

敕諭所有應進

聖壽冬至元旦表儀俱准於元旦併貢以彰柔遠之至意
近見該國王於領受賞賚等事皆特遣使臣齎表奏謝
朕念該國距京三千餘里貢使往來未免勞費嗣後凡
屬謝恩本章俱著與三大節表一同齎奏不必特遣使
臣永著為例該部即行文該國王知之

十一月丙申

上諭理藩院八旗遊牧地方甚屬緊要近來總管等仍有貪婪勒索屬下之事蒙古等雖欲陳訴情由因無巡察之人即有含冤受抑者亦無處控告著於每年或部屬司官或監察御史派出一員令其巡察如有此等之事即著據實叅奏儻徇庇隱匿被接任之員查出將巡察官一併從重治罪其歸化城亦照此派往

庚子議政王大臣等議覆署廣東巡撫傅泰奏遲

羅國進貢方物並請採買京弓銅線應否採買賞給之處請

旨遵行

上諭曰暹羅國遠隔重洋輸誠嚮化恭順修職歷有年所其所請採買物件著行令該撫採買賞給以示朕嘉惠遠人之意

雍正九年辛亥二月乙巳

上諭貝勒頗羅鼐朕為統一天下之主凡四海生靈一視

同仁無分中外乃者附近帕爾城之布魯克巴地方人等起釁搆兵互相讎殺朕聞之深為不忍軫念於懷爾能仰體朕意遣使與班禪額爾得尼之使一同前往和說又遣使宣諭朕之恩德布魯克巴地方人等遂感悟息爭輸誠嚮化各帶部落敬順無違且請朕施恩訓誨朕甚嘉悅布魯克巴地方人等自茲以往宜各守疆界共相和睦永遵佛教祇奉恩綸如能黽勉力行朕自益加優眷布魯克巴之諾顏林親齊雷喇布集後身喇嘛

渣色禮布魯克古迹等著加恩賞賜噶碧東羅布喇嘛
率衆先歸尤為可嘉著從優賞給以示朕懷遠嘉順之
至意爾可將此諭旨宣諭布魯克巴地方人等知之

七月庚辰

上諭青海王貝勒貝子公台吉等爾等俱係顧實汗之子
孫自祖宗以來依附內地邊疆恪順供職我

聖祖仁皇帝視爾等如子孫撫育六十餘年寵遇之隆至
優極渥且念爾等尊崇黃教是以我朝於達賴喇嘛班

禪額爾得尼備極恩眷若準噶爾者暗遣賊兵侵犯西地殺害喇嘛毀滅供器實為黃教之罪人爾等儻違棄先人崇祀之教辜負國家歷沛之恩一家之內興起兵戎以啟賊人僥倖之端雖愚昧之人亦不出此前者羅卜藏丹津聽信流言敢行背叛我朝發兵征勦逃竄在準噶爾處困苦辱耻爾等無不聞知今爾等若到彼處路途如許遙遠馬畜必致疲斃彼豈能為爾等置立產業分與游牧地方令爾等各統所屬依然保聚乎況準

噶爾四面皆成讎敵終歲爭戰不休凡用兵之處必置爾等於前虐使任意豈若各守祖父基業永享太平之為得乎爾等若不熟計利害聽伊誑誘之詞依附賊人妄思蠢動將來興師問罪必先及爾等彼時即欲悔禍國法不爾貸也朕所以頻降諭旨反覆開導令爾等會集兵丁小心防守將屬下人早行移入者實冀保全爾等非欲調遣爾等為進剿之用也爾等當思朕愛護安全之至意詳細曉諭屬下人等合力防範果能遵旨奉

行朕自大沛恩膏爾等遊牧妻子既無吞併之憂而中外安居亦永享無窮之福矣

九月戊辰

上諭理藩院邊疆地方報稱鄂羅斯之郎喀前來鄂羅斯近來甚屬恭順伊等貨物至楚庫拜星處即行申報而邊疆地方遲延致使伊等久候時值隆冬其盤費馬畜未免困苦朕特施恩著理藩院派官一員於戶部庫內領銀一萬兩前往賞給以為途中買換馬畜之資

庚午

上諭四十九旗扎薩克蒙古等爾等於

太宗皇帝時即敬順歸降創業之際輔佐効力至於朕身受恩四世爾等感戴之忱朕所確知爾等之騎射技藝亦倍勝於準噶爾但恐爾等之意以喀爾喀遠居絕塞準噶爾即有劫掠亦不過及於喀爾喀爾等可置於度外不知喀爾喀之王台吉俱係爾等成吉思汗之苗裔一姓之兄弟也準噶爾者自元朝背叛至今世為爾等

雖敵喀爾喀乃衆扎薩克之屏障可置於度外乎從前
皇考親自領兵在圖拉昭莫多地方滅噶爾丹保全喀爾
喀者亦為爾衆蒙古也其後策妄阿喇布坦之兵來侵
哈密被我兵擊敗來擾吐魯番被我兵勦殺又暗使策
零敦多卜等襲破西藏

皇考為爾衆蒙古奉佛之地遣將興師破賊定藏今朕於
兩路駐劄大兵亦為爾内外之蒙古也嗣後王台吉與
弁兵等果能出羣効力朕自從優議叙并賜與世襲巴

圖魯達爾漢之號使令名垂於永遠準噶爾事定之後
干戈永息長享太平之樂矣勉之勉之

十月戊午

上諭大學士等八旗察哈爾俱累世効力之舊人從前征
討南方勦滅噶爾丹並隨圍出獵以及數年用兵於準
噶爾宣力之處不可枚舉此次達什率領察哈爾兵一
千名較衆先到軍營又擊敗準噶爾賊人策零敦多卜
等奪回駝馬等物甚屬可嘉昨厄魯特大臣來京奏稱

舊察哈爾人等之生計反不如新厄魯特等語朕聞之
惻憫今沿邊居住之蒙古並王大臣等馬羣之蒙古多
有伊主不能養贍者似此生計艱難朕心不忍爰命大
臣前往查勘令伊等各得養贍將朕此旨通行傳諭

十一月丙寅

上諭喀爾喀汗王貝勒貝子公扎薩克台吉並各屬下人
等近日準噶爾賊夷噶爾丹策零寄信與王喇嘛扎卜
稱喀爾喀厄魯特法教相同本屬和好及噶爾丹博碩

克圖時失睦既而我父追念前好曾屢奏

皇帝乞將喀爾喀青海復舊安置今

皇帝欲將我如喀爾喀青海入於旗下佐領之內給與封
號以故我等興兵至此若能成事則將喀爾喀青海照
舊安置即不能成事亦不令統屬於人等語此實係賊
夷姦詐離間之詭計從前爾喀爾喀人等被噶爾丹戰
敗以致失地我

聖祖皇考憫念爾等歸誠存恤愛養將喀爾喀諾顏等按

伊原品封為汗王貝勒貝子公扎薩克屬下人等俱各
賜生業安享富饒令歸原游牧處爾等之感恩報德同
心効力乃人所共悉者準噶爾賊夷出狂悖之言借安
置爾等為詞欲肆行擾亂即論爾等之封號親王郡王
貝勒貝子等爵位俱係我朝冊封宗室子孫兄弟之號
其餘臣下雖効力立功並無封貝子之例惟四十九旗
扎薩克成吉思汗之後博爾濟錦氏台吉等誠心歸順
我

太宗皇祖俱賜以宗室封號視如骨肉結為姻親累世寵榮何嘗視為奴僕乎至編設旗分佐領亦欲其易於查考以便加恩並恐扎薩克等互起爭端之故今已及百年何嘗役使爾等一人乎自分旗以來爾喀爾喀之鄂托克達魯哈等屬便於查管遇饑饉則賑濟之行圍出兵則厚賞之可有催徵之事乎此亦爾等所共知者準噶爾賊夷姦詐狡獪外托黃教而擾亂藏地違背教原口雖稱為青海喀爾喀兩家而又搶掠爾等將胡土克

圖俱欲搶奪姦惡極矣且準噶爾一姓自鄂爾栢克尼古勒蘇克齊汗之後興兵擾亂諸部落殘殺博爾濟錦氏幾至斷絕至今讎怨未已今策零敦多卜前來被爾喀爾喀等勦殺敗遁賊夷懷恨必深思欲報復乘隙擾亂若賊夷之事不定則爾喀爾喀不得安衆蒙古亦不得安朕是以不惜國帑發數萬大兵遠行征勦綏靖邊圉祇為爾等生全之計也爾屬下人等宜仰體朕心各加奮勉藉朕威力效法此次進兵之王貝勒貝子公台

吉等朕必為爾等勦滅賊夷永保安寧前者噶爾丹作亂時爾等互為搶掠盜竊今又有搶掠盜竊者此種惡習甚屬愚賤其務力為悛改且爾等既屬內地多年共知法度若舍棄游牧擅行掠竊干犯王章何不力戰賊夷立功雪耻乎即爾等歸順賊夷亦斷不能保全爾等令爾等安享也爾等宜熟計之

雍正十年壬子三月己卯

上敕諭喇達克汗德中納木扎爾朕統御寰區內外視為

一體凡撫恤遠人獎勵恭順懲治悖逆皆朕分內事也爾德中納木扎爾遣使向辦理藏務大臣等呈稱臣惟以辦理國事尊崇佛教量力行走探取葉爾啟木準噶爾處信息報知貝勒頗羅鼐轉行奏達乞早降恩諭等語朕覽之甚為嘉悅從前因爾父尼瑪納木扎爾與貝子康濟鼐同心報効朕已沛恩膏今爾亦效法爾父與貝勒頗羅鼐一體効力甚屬勤勞嗣後益加黽勉以紹前徽則永享朕恩於無既矣茲特頒恩賜賞給緞疋等

物爾其祇領特諭

八月庚午辦理藏務侍郎僧格等奏巴爾布國雅
木布葉楞庫庫穆三汗奉表進貢方物

上敕諭巴爾布國雅木布葉楞庫庫穆三汗據爾等奏稱
從前不知內地禮儀未遂觀光之志今遣使朝覲恭請
訓諭進貢之物不多略盡恭敬之忱等語朕為天下主
一視同仁爾等汗越在邊遠自古未通華夏慕朕仁化
萬里輸誠朕甚嘉悅所進方物悉已收納第念道路遙

遠往返艱難爾使臣即由西藏遣回爾等汗但與西藏
貝勒頗羅鼐協力和衷維持黃教以副朕普育羣生之
至意特賜緞疋玻璃磁器各種一併發往

十月辛酉理藩院奏杜爾伯特固山貝子班珠爾
等三旗地畝歉收請賞給米石並借給買米銀兩

上諭曰若俟行文扎薩克等行查未免遲延其扎魯特兩
處地方著派出侍衛達哈蘇並戶部司官一員帶銀一
萬兩到彼將家口數目查明賞賑杜爾伯特與黑龍江

相近著速行文將軍卓爾海會同該處御史將杜爾伯特蒙古人等家口數目查明或動用倉穀或動用庫銀酌量賞給

雍正十一年癸丑七月庚辰

上諭辦理軍機大臣等據侍衛達哈蘇奏稱科爾沁公喇嘛扎卜旗分並無牲畜其貧苦人等止有六月至八月米糧今年種穀無多又經亢旱無收等語朕思此所種之穀即使全收亦不足養贍數千人口恐至饑饉流散

不可不預為籌畫伊等與何處相近即動支彼處米穀賑濟及如何養贍俾得過冬之處爾等查議具奏

八月丁丑

上諭理藩院喀喇沁王伊達木扎卜等旗分田穀歉收著派侍衛司官各一員前往查勘實在貧人按名賑給再貝勒僧滾扎卜等旗分地畝雖稱五六分以上收成不等或其中亦有乏食不能餬口者著一併查出酌量賞給

雍正十二年甲寅十一月庚子

上諭辦理軍機大臣等據哈密貝子額敏奏稱所屬回民等有可種四百石穀之地現在軍營屯田界內願將此作為官地等語哈密地方悉皆朕土無俟伊等獻納且大兵既撤之後此地皆可留與哈密亦斷無因其獻地另行安置民人之理但此地現與官地交錯若不允其所請照舊令回民耕種難免互相爭角儻收為官地又係回民生計所資朕意或另賞伊等地畝及牛具籽種

或每歲將應得穀石折給銀兩之處著署大將軍查郎阿等就近查議

雍正十三年乙卯六月壬辰福建提督王郡奏呂宋國以麥收歉薄今附洋船載穀二千石銀二千兩海參七千斤來厦賣銀糴麥查五穀不許出洋律有明禁令呂宋以穀易麥請

旨欽定

上諭內閣朕統御寰區內外皆為一體呂宋雖隔重洋朕

心並無岐視國家之所以嚴禁五穀不許出洋者乃杜
姦商匪類私販私載暗生事端之弊若該國偶然缺少
米糧以實情奏聞於朕朕尚酌量豐餘以濟之今呂宋
以麥收歉薄載穀易麥更為情理之當從者著該督撫
等轉飭有司按照穀麥時價均平糶糴不許內地之人
抑勒欺詐俾番船載麥回國以濟其用並將朕旨傳諭
來商知之

大清世宗敬天昌運建中表正文武英明寬仁信毅大孝
至誠憲皇帝聖訓卷三十五